



Geschichte der geistlichen Stiftungen, der adlichen Familien, so wie der Städte und Burgen der Mark Brandenburg

[Urkunden-Sammlung für die Orts- und spezielle Landesgeschichte]

Riedel, Adolph Friedrich

Berlin, 1861

LXXXVI. Herzog Johann von Mecklenburg vereignet dem Kloster Marienpforte, was Borko von Kerkow und Andere dem Kloster in Thomsdorf verkauft haben, giebt auch das Angefälle auf der Mühle zu Krufelin, ...

Nutzungsbedingungen

[urn:nbn:de:hbz:466:1-55721](https://nbn-resolving.org/urn:nbn:de:hbz:466:1-55721)

LXXXVI. Herzog Johann von Mecklenburg vereignet dem Kloster Marienpforte, was Borke von Kerkow und Andere dem Kloster in Thomsdorf verkauft haben, giebt auch das Angefälle auf der Mühle zu Kruselin, am 16. Mai 1420.

Up dat, dat di dink vnd die ghescheft, die in der tiid scheen, mit der tid nicht vorgan vnd komen von der dechnisse der minschen, so is des behuf, dat me die dink veste mit vorsigelden breffen. Hir vme wy Johan, von Godes gnade Hertoge to Meklenburg, to Stargard vnd to Rostok here, don witlik mid disse gegenwartigen scrift alle den jenen, die nu sint vnd in tokomenden tiden komen mogen, das vor vns geweset is vnse truwe Borke von kerkow, to feltberge wonachtich, mid gantzer macht alle derjenigen, den dat anroret in der vorlatinge des dorpes Tobenstorp ond an den zaken nach screuen, vnd sundergh von Albertes von kerkow wegen, plonges vnd hinrik, broder, geheten di von Tobentstorp, hans karstauel vnd Ludeke Cratz, Broder, vnd von Henningk von Gloyen wegen, vnd heft vor vns vorlaten dat dorp Tobenstorp mit allem rechte, Tobehoringe, nuttze vnd frigheit, als das licht in syner schede, also, als dat Borke mid vnser anderen guden luden irgenannt vnd ire vorvaren frigelt bezeten hebben; vnd disse vorscreuen vnse truwe Borke von kerkow heft vns gebeden von finer wegen vnd von der vorscreuen vnser gude lude wegen, den dat mede anroret, dat wy dit vorscreuen dorp Tobentstorp ligen vnd voreruen wolden mid alle syner tobehoringe dem Godeshuse to Boytzenburg, ane druttich mark geldes wonliker munte, die Borke vorgeannt sundergen to ener ewigen vicarien lecht heft, de me bestedigen vnd buwen schal in de kerke des Closters Boytzenborg. Vnd wy hebben na rade vnser truwen Rätgeuer mid wolbedachten mode, sundergen vme meringe vnd to okinge willen des gotliken dinstes vnd ok vme salicheit willen vnser olderen, vnser vnd vnser eruen zelen, den di juncfrowen to Boyntzenburg in dem Clostere to ewigen tiden in erer dechnisse hebben scholen, so hebbe wy mid vnser eruen vnd nakomelingen dem Godeshuse des Closters Boyntzenburg vnd den Juncfrowen, die dar nu ynne sint vnd in tokomenden tiden dar yn komen mogen, gelegen vnd voreignet, ligen vnd voreigenen to ewigen tiden mit orkunt dieses breues dat vorgeannte dorp Tobentstorp also, als dat Borke vorgeannt von hete der vorscreuen vnser guden lude vor vns vorlaten heft, ok als ire kop breff darup vtwiset, mid pacht, med bede vnd mid Tinsse vnde mid schap Tegeden vnd mid der anwaringe enes haluen wispel pachtess alle iar to borende vp der molen to kruselin, mid richte vnd mid denste vnd mid allem rechte, hogest vnd fideft, an hant vnd an hals, mid allem akker, buwet vnd vngebuwet, mid holten, worften, Buschen, wischen, weiden vnd weren vnd Gentzliken mid aller tobehoringe, nutteheit vnd frigheit, als dar dit vorgeannte dorp licht an syner schede, ane die druttich mark geldes vorscreuen vtgenommen; vnd wy mid vnser eruen vnd nakomelingen to ewigen tiden hebben vns mid alle dar nicht ane beholden, men dat dit vorgeannte dorp in vnser herscop schede blift. Vppe dat, dat vnse vorscreuen lighinghe vnd voreigninge to ewigen tiden vast vnd vntobroken bliuen, so hebbe wy vorscreuen here hertoghe Johan von meklenburg vnse Ingesigel mid willen heten hengen nedden an disen brieff, de Geuen vnd Screuen is to Tangermunde vp der elwe, in der tiid vnser segnissen, na vnser heren Cristi gebord vinteynhundert Jar, dar na in dem twintgesten Jare, in vnser heren hemmeluades dage. Her ouer hebben gewesen vnser truwen, de duchtigen her paschetagh, Ritter, henrich feltbergh, vnse marschalk, vnd henricus Grau, vnse Scriuer.